

INUIT ATAQATIGIIT

Inatsisartuni



UKA17/95
3. oktober 2017
Hans Aronsen

Uunga siunnersuut: Kalaallit Nunaanni aalisarnermi pisuussutininik akitsuusersuineq pillugu Inatsisartut inatsisaat nr. xx, xx. xxx 2017-meersoq.

(Aningaasaqarnermut Akileraartarnermullu Naalakkersuisoq)

Pisuussutsit uumassusillit aamma aalisagaappata inuiannit nunatsinniittunit tamanit pigineqartut atorluarneqassapput. Tamanna pisinnaavoq ikioqatigiinnikkut paaseqatigiinnikkut suleqatigiinnikkullu, pingaartumillu naligiimmik atugassaqartitsineq tunngavingalugu sulinikkut. Matumuunalu partiit tamaasa qinnuigaakka manna suliakkiussaq tigulluarlugu peqatigiilluta suliaasaq suleqatigiissutigiumaaripput.

Sineriarujussuatsinni inoqarfinni 75-it missaaniittuni siamasissorujussuarmik najungaqariuseqartugut nunatta pisuussutaanik tamanik sutigut tamatigut atorluanaanissatsinnik immitsinnut pisussaaffilerpugut. Aningaasallu atorfissaqartitagit pinngortitamut uumasuinullu nakkutiginninnermut ilisimatusarnermullu, inoqatinnguatsinnut ikiortarialinnut isumassuineranut, meeqqat atuarfiinik iluarsaassinernut nutarterinerinullu, peqqinnissaqarfimmi pisariaqarteqisatsinni ineriartortitsinikkut sullissinikkullu, allarpassuarnullu akitsuutit naalakkersuisunit eqqunneqaqqullugit inatsisartunut innersuussat Inuit Ataqatigiinniit suleqataaffigerusuppagut.

Suliakkiussami inatsisit arlallit inatsimmut ataatsimoortunngornissaat allaffissornerup eqikkarneranik kinguneqartussa "Kalaallit Nunaanni aalisarnermi pisuussutininik akitsuusersuineq pillugu Inatsisartut inatsisaat"-mut taperserparput. Ilaatigut suleqatigiisitaliat naalakkersuinikkut pilersinneqartut imatut ittunik suliaqartarsimasut paasilluarlugit.

Aalisarnermilu pisuussutininik akitsuusersuineq manna saqqummiunneqartoq tunngaviatigut tapersersornarpoq, taamaattorli apeqqutit arlallit qulaajaqqissaartariaqartut Inuit Ataqatigiit isumaqarpugut. Sinerissap qanittuani akitsuut appaqqissinnaanersoq, avammut tunisat akitsuutaasa qaffaqqilaarsinnaanerat, aningaasanut inatsimmi isertinneqartussanut allanngoriaataangitsumik periarfissaanersoq qulaajarlugi.

Akitsuutit øre imaluunniit koruuni aallaaviunerat sumik pissuteqarnersoq qanoq kinguneqassanersoq, taamatullu aamma % atorneqarpat qanoq kinguneqassanersoq paasisaqarfigerusuppagut. Ilisimavarpummi aalisakkat akii amerlasuutigut sinerissami annertuumik nikerartartut, taamaammallu koruuni aamma %-p nunatta karsianut pissarsissutaanerusinnaaneri suliap ingerlanerani paasissallugit pingaartippagut.

Taamatut oqaaseqarluta Aningaasaqarnermut Akileraartarnermullu Ataatsimiititaliami apeqqutit qulaajarlugit suliarineqarnissaat kissaatingaarput, uanilu apeqqummi aalisarneq annertuumik kallarneqarmat Aalisarnermut Piniarnermut Nunalerinermullu Ataatsimiititaliaq isummanik avitsivigineqarsinnaasoq ilanngullugu Inuit Ataqtigiinniit innersuupparput.